

楊襄毅公本兵疏議

楊襄毅公本兵疏議卷之四

覆宣大總督都御史

邊務疏

少保兼太子太保兵部尚書臣楊博等謹

題爲據憑邊飭邊備以防虜患以安重鎮事職方清吏司案呈奉本部送兵科抄出總督宣大山西等處地方軍務兼理糧餉都察院右副都御史張松題奉

聖旨該部知道欽此欽遵抄出送司案呈到部看得總督宣大山西軍務右副都御史張松條陳五事均切邊計相應開立前件擬議上請定奪嘉靖二十八年十月十九日題奉

聖旨依擬行欽此

一兼用馬步以實營陣看得馬步相兼自昔用兵之
長略原無止用馬軍不用步軍之理事在閫外自難
遙制至於馱載盛甲本官欲要五人爲伍用馬一匹
無非憫恤步軍補偏救弊合無悉如所擬通行曾爲
三鎮從實舉行違悞阻撓者聽其徑自叅究

一修舉兵車等營以備衝戰看得兵車之制自昔記
之先年總督尚書余子俊用之宣大屢建奇功子俊
嘗謂運無足之城策不飼之馬誠爲至論所據本官
具題前因深得子俊之遺意合無悉如所擬通行披

處撫鎮等官在大同則將原置左右衛兵車移於鎮城在宣府則將原廢兵車在山西則將棄置鹿角柵木如法速整各選老成廢將管領時加操演以後果收成效聽巡撫衙門保薦叙用

一議處援兵以保危鎮看得薊州一鎮內拱京師猶之腹心以宣大爲左掖以遼東爲右掖以故先年設立宣府遊兵一枝大同遊兵二枝專一入衛況本部原議止令近關駐劄相機進止事本圖融勢非拘泥合無仍行二鎮撫鎮官將前項遊兵遵照節奉

欽依選補足數於來歲正月抵關駐劄如薊鎮有警宣鎮

無事照舊入衛如宣鎮有警薊鎮無事隨方策應要
之均爲畿輔難以自分彼此

一議處村堡以資保障看得脩築堡寨誠爲守邊要
務一應事宜本官議處已明無容別議至於責成三
鎮撫鎮守巡兵備一節尤爲得策合無悉如所擬勒
限完報仍聽巡按御史查覈具奏以憑陞賞

一乞獎忠勇以激勵人心看得壯夫麗鐸拍贊率衆
力抗強胡天照一堡卒賴保全功甚可嘉合無授以
冠帶總旗就註蔚州衛所仍令管理本堡以爲忠勇
者之勸

覆視軍情官右通政唐順之海防經略疏

題爲條陳海防經略事職方清吏司案呈奉本部選兵
科抄出視軍情官通政使司右通政唐順之題奉

聖旨該部看了來說欽此欽遵抄出送司案呈到部看

視軍情官右通政唐順之條陳禦海洋等事本官

命進行得之目擊比之選度億說者不同相應開立
議擬上請定奪嘉靖三十九年二月初一日題奉

聖旨依擬行欽此

一禦海洋看得據險守要兵家上筭崇明諸沙舟山
諸山皆海賊入寇之路本官欲令各官分駐其地正

與西北諸邊出境截虜相類深得先則制人之術合
無備行浙直督撫等官每於春汛之期哨果有警行
令蘇松兵備或海道內選取一員暫駐舟山總兵副
總兵相度機宜往來海洋督率各總分守會哨如或
疎虞致賊入港登岸以次論罪悉如今議其衝擊來
船功次委與擊其惰歸者不同今後有能於新至真
倭內斬獲首級一顆者給銀二十五兩以示優異至
於視軍情官原係一時權宜若使得人常如唐順之
自當坐收三片之捷否則事體未免掣肘以應停設
一固海岬看得賊既不能禦之於海則當禦之於岬

沿海一帶休戚相關若使自分秦越或不行拒堵或
不相策應希免已責貽人以禍均屬悞事本官欲要
力除舊套交相坐罪深得責成之意合無備行浙直
福建督撫等官悉如所議施行若賊已下船果有衝
阻遏使之不得登岸深入者雖無首級照依題准奇
功事例陞賞

一圖海外看得倭賊入寇多由我民爲之勾引蓋逋
逃不歸則禍本未拔東南委無息肩之期合無備行
各該督撫等官多方招徠務使不逞之徒以次歸正
其入貢一節聽禮部徑自查議

一定軍制看得今之用兵大率有三曰練曰募曰調
本官謂以練兵爲實事以募兵爲權宜以調兵爲奇
道遠募不如近募多調不如少調反覆辯析明白痛
切合無備行浙直福建督撫等官遵照節奉

明白務以團練土兵爲主如果日下不堪戰守早爲計議
某處某兵可調某處某兵可募應徑行者徑自酌行
應具奏者以次具奏俟土兵練成即爲停罷

一鼓軍氣看得本官所議鼓軍氣一節其詞甚嚴其
義甚正真足以振頹靡之習收敵愾之效但事在閫
外合無備行總督等官果有怯懦觀望者聽以軍法

從事不得過爲姑息亦不許專擅妄戮反傷和氣

一復舊制看得沿海備倭之制

祖宗設置甚詳但時平易玩歲久漸弛本官歷數舊制如水寨軍伍屯田市舶均係良法委當脩復合無通行浙直福建廣東督撫各官逐項查議務令人情事體俱得其宜不失

祖宗建置之初意作邊具矣以憑覆議

一別人才看得將領勇怯一方安危所係况在海防尤爲喫緊本官條列浙直總兵盧鏜副總兵劉顯所宜久任革任寧紹叅將戚繼光見監原任通叅叅將

黑孟陽似應使過狼山副總兵曹克新宜投閑散除
曹克新近該巡撫都御史李遂叅論已經聽調外合
無將盧鏜劉顯久任責成戚繼光准其贖罪遇缺酌
用黑孟陽提問畢日另行議處

一定 廟謨看得外患未息內變日生即如近日縛
官劫獄是皆履霜之漸本官欲要備講招懷撫諭之
略防海固圉之機變爲長慮但事在彼中殊非

廟堂所能懸斷合無通行浙直福建督撫等官從長計
議備細具奏其內外大小臣工果有制倭長策亦聽
各另條陳廣集衆思

會議薊鎮督撫上許論等添設兵備憲臣監督疏
題爲陳愚見以飭邊務事兵科抄出總督薊遼保定等
處軍務兼理糧餉太子太保兵部尚書兼都察院左
副都御史許論整飭薊州等處邊備兼巡撫順天等
府地方都察院右僉都御史張玘題俱奉

聖旨該部知道欽此欽遵通抄到部臣等會同吏部尚書
臣吳鵬左侍郎臣郭朴右侍郎臣馮天馭議得薊州
昌平二鎮近在畿輔乃腹心元氣之地比之他鎮迥
不相同雖經設有兵備三員地方廣遠顧理不周臣
博總督之時暫委別道分區管理是乃權宜之策許

論張玘今欲再添兵備二員畫地責成實爲經久之計相應通行依擬合候

命下吏部於懷柔永平各推舉相應官二員請

旨簡用與原設密雲薊州昌平三處兵備照依後開定擬地方請換 勅書欽遵行事一切撫夷脩邊事宜悉屬管理仍聽總督巡撫官節制守邊之日稽查奸弊監督戰守主客大小將領如有臨陣退縮及不公不法俱許指實叅究謀勇勤勞者具呈督撫衙門甄別奏請新添兵備合用關防行移禮部查議鑄給其衙舍吏書門皂等項移咨彼中徑自酌處嘉靖三十九

年二月初一日題奉

聖旨是欽此

一原設昌平兵備副使一員今擬管理居庸鎮邊城
二區監督副叅等官仍管昌平一州并各陵衛所
一擬設懷柔兵備副使一員管理黃花鎮石塘嶺二
區監督副叅等官駐懷柔縣列銜山西分管通州懷
柔縣順義縣通州左衛通州右衛神武中衛定邊衛
營州左屯衛渤海守禦千戶所

一原設密雲兵備副使一員今擬管理古北牆子嶺
二區監督副叅等官分管密雲縣三河縣寶坻縣香

河縣平谷縣王田縣密雲中衛密雲後衛興州左屯
衛興州後屯衛營州中屯衛營州前屯衛營州後屯
衛梁城守禦千戶所

一原設薊州兵備副使一員今擬管理馬蘭谷太平
寨二區監督副叅等官分管薊州遵化縣豐潤縣遷
安縣薊州衛營州右屯衛鎮朔衛遵化衛東勝右衛
忠義中衛興州右屯衛興州前屯衛開平中屯衛宣
河守禦千戶所

一議設永平兵備副使一員管理燕河營石門寨二
區監督副叅等官駐永平府以銜山東分管永平府

潮州樂亭縣昌黎縣盧龍縣撫寧縣永平衛盧龍衛
東勝左衛撫寧衛山海衛

會議浙直總督都御史胡宗憲計獲逆寇王直陞
賞疏

題爲仰仗 玄威計獲巨寇懇乞

天恩優錄效勞有功人員以勵將來事先該兵部題職方
清吏司案呈奉本部送兵科抄上總督浙直福建等
處軍務兼巡撫浙江地方都察院右都御史兼兵部
右侍郎胡宗憲題奉

聖旨兵部看議來說欽此欽遵抄出送司卷查先爲逆賊

罪惡著明亂本已得懇乞

宸斷昭揭討賊大義以定人心以彰

聖武以肅清江海事該巡按直隸監察御史金澍陶承學
各題稱逆賊王直久住日本主謀煽禍連歲不已俱
要懸立爵賞俘馘賊首等因該本部覆議備行各該
督撫等官各將王直罪惡刊刻榜文傳示邊海州縣
多方設策早正國法以快人心一應人等有能斬
獲王直首級來獻者查照宣大近題事例封以伯爵
賞銀一萬兩授以坐營坐府職銜管事在倭華人或
能悔罪將王直斬獲來降者一體陞賞等因奉

聖旨是欽此已經通行欽遵去後今該前因查呈到部臣等看得逆酋王直等背華向夷罪惡深重一旦爲我用間擒獲宜諸法典是皆我

皇上之功一時諸臣何敢言勞但彼時奉有

欽依懸賞甚重若竟置之不叙倭患未寧恐無以爲方來之勸事干功賞相應廣集衆思以昭公是今候

命下容臣等會同九卿并六科十三道掌印官逐一計處

明白斟酌具奏恭候

聖裁嘉靖三十八年十二月二十四日題奉

聖旨是欽此欽遵抄捧到部臣等會同吏部等衙門尚書

等官臣吳鵬等看得逆犯王直等本以華人甘爲夷黨糾集醜類始惟作孽於島中勾引狂奴竟至流毒於海上出師命將上厯

九重南顧之懷屠邑攻城下貽四省東隅之失于時言官建白兵部議覆深惟除惡務本之意不吝萬金封爵之賞仰荷

聖明躬叩上穹惠流下土大張天憲今已明正其辜默運玄威早爲陰奪其魄十年巨寇一旦成擒神謀

聖武臣等淺昧何所掄揚所據一時當事諸臣決策陳力勞亦難泯除功非應錄者不議外其在外宣力如總

督軍務都察院右都御史兼兵部右侍郎

王雲龍

專閫外權重師中張兵拒險而籌畫惟精月向設謀而計處允當功委非常賞當從重但今江海妖氛未見盡熄正屬本官殫力設謀刻期蕩平之日似應酌處至於地方文武諸臣各奮忠勇共冒艱危或承詔委而遠涉鯨波或授方略而深入虎穴或極口誘之使之畏而弗犯或以身殉之使之信而不疑職固不同功亦有間如原任副總兵今陞浙直總兵官盧鏜中軍坐營官都指揮戴冲霄紹興府通判吳成器委當優錄原任浙江叅政後陞巡撫都御史王詢原任

陳元珂原任叅將戚繼光原任都指揮後陞叅將張
四維原任中書今陞評事羅龍文中軍把總指揮陳
光祖楊永昌納級指揮朱尚禮童華邵岳謝天與生
員蔣洲陳可願方大忠義士胡節中武生朱見委亦
當錄原任叅政今陞按察使胡堯臣副使李景萃食
事李三畏都指揮王欽原任守備何本源委當併敘
內俞大猷見發立功戴冲霄戚繼光張四維陳光祖
蔣洲胡節中何本源俱係提問人數似應准贖其戴
冲霄戚繼光陳光祖功浮於罪似當別處其尚禮堯

華邵岳冒險誘賊仍當叙錄內納級指揮夏正捐軀
死事忠勇可嘉委當厚恤臣等逐一叅詳輿論既同
相應通行議擬合候

命將胡宗憲特加陞廕盧鏜吳成器量陞職級王詢陳
元珂羅龍文楊永昌謝天與陳可願方大忠朱見重
加賞資胡堯臣李景萃李三畏王欽量加賞資俞大
猷免其立功戴冲霄戚繼光張四維陳光祖蔣洲胡
節中何本源俱免提問內戴冲霄戚繼光陳光祖仍
聽兵部量行錄用朱尚禮童華邵岳量陞副千戶銓
註附近衛所夏正贈以都指揮使伊男應與千戶以

勵忠魂仍行胡宗憲仰感

皇上副託之隆下慰生靈縣切之望廣集群策益竭丹誠
務將餘寇遂勦以靖地方及照在內宣猷如大學士
嚴嵩精忠獨秉力殫入告之猷勝筭全收坐致外攘
之績功當首論大學士徐階李本二公弘化而咸有
一德千里決勝而共成萬全功當並論均係密勿重
臣簡在

聖心所有優錄 殊典臣等未敢定擬通乞

聖裁嘉靖二十九年二月初六日題奉

聖旨這逆賊擒獲實荷玄佑你每議功全不奏請舉謝豈

人心歟胡宗憲矢心爲國殫竭忠謀勞績殊常宜加顯
擢以示激勸着加太子太保左都御史兼兵部左侍郎
照舊總督還廕一子與做錦衣衛副千戶盧鏜王詢并
吳成器各陞二級陳元珂等各賞銀二十兩胡堯臣等
各十兩俞大猷并戴冲霄等桂贖朱尚禮等各陞原籍
衛所副千戶夏正捨身爲質死事可憫贈都指揮使廕
一子與做正千戶欽此

覆陝西總督侍郎魏謙吉等議處甘肅逃夷疏

題爲處置逃來回夷以安地方事職方清吏司案呈奉
本部送兵科抄出總督陝西三邊軍務兵部右侍郎

兼都察院右僉都御史魏謙吉巡撫甘肅等處地方
都察院右僉都御史胡汝霖巡按陝西監察御史甄
敬等題俱奉

聖旨兵部知道欽此抄出送司卷查先爲議處安插逃來
回夷以弭後患事該陝西督撫等官侍郎王夢弼等
題稱逃來回夷虎爾的等逃來求生乞要再加議處
安插隨該本部議將虎爾的等六十四名口內係哈
密屬夷者許令拜言字刺等鈐束或收充夷軍若係
土魯番者亦須厚其廩餼俾之得所待回夷隨市及
一朝貢之期處給衣糧帶回本國等因覆奉

欽依已經通行欽遵去後今該前因查呈到部看得陝西
總督撫鎮巡按等官侍郎魏謙吉等題稱回夷陸續
逃來肅州積至五百餘名合無暫安甘肅二處夷廠
及分發各堡令其傭工自食聽候隨市及進貢夷人
回日一併撫遣出關各一節為照前項回夷兇狂奸
狡乍叛乍從既稱窮來歸我若拒之不納則非

聖皇撫字之仁若處之太疎則失 中國制禦之義所據
總督侍郎魏謙吉等具題前因威惠並施弛張兼用
俱已允當無容別議合候

命下移咨魏謙吉會同撫鎮巡按等官胡汝霖等查照今

議速將各夷暫發甘肅二處夷廠依附進存回夷度
日或分發各堡令其傭工自食仍候隨市及貢夷回
日一併撫遣出關果有不願歸者臨期另為具奏一
面行令撫夷官通時加戒諭各夷不許生事作孽自
干法典嘉靖三十九年二月初十日題奉

聖旨是欽此

覆南京科道官郭斗等勘明南京府部訐奏疏

題為申明職掌乞復成法定紊亂以固根本事職方

清吏司案呈奉本部送兵科抄出南京兵科等衙門

科事南京戶科給事中官郭斗等題奉

聖旨兵部知道欽此又該南京守備掌南京中軍都督府
事太子太保魏國公徐鵬舉奏為懇乞

天恩俯賜洞察以正 國法以明心迹事奉

聖旨該部知道欽此通抄送司卷查先該南京中軍都督
等府掌府事太子太保魏國公等官徐鵬舉等與同
南京兵部尚書張鏊等訐奏前事該本部看得府部
相維各有職掌文武共濟不宜忿爭今據所奏在徐
鵬舉等則謂張鏊各項事務干碍

成法若果是實責固難辭在張鏊則謂前項事務俱奉
明旨若使不虛又非其罪但事在彼中關涉

國體必須查覈明的方可罷服其心合候

命下本部備行南京兵科會同科道等官即將二臣所奏事情從公體勘務要分別是非從實具奏等因題奉聖旨是欽此欽遵備行去後今該前因案呈到部臣等看得南京兵科等衙門給事中郭斗等所勘及守備魏國公徐鵬舉等所辯事情查其原奏雖係鵬舉及尚書張縉交口分析之詞究其禍端實皆誠意伯劉世延明挾已私陰假衆論為此瞞訾雖起于小嫌欺誑實關乎大節若使所奏不虛非應有歸今既勘稱無據法當反坐况留都乃根本重地各官為保釐大臣

必須分別處分 國體人情方為穩便伏望

皇上將劉世延革職 陶佳仍加罰治併乞

天語叮嚀徐鵬與張鏊嚴加飭戒令其上感

聖明委任之隆 思司事宜恭之義以後一應事宜謀斷

相資毋惑於私言可否相濟務成乎公務如或自行

冒臆妄生嫌疑聽南京科道官指實查叅從重究治

嘉靖三十九年二月二十五日題奉

聖旨劉世延革任閑住徐鵬舉張鏊着協心供職不許妄

生嫌疑欽此

覆議戶部樽節邊費三事疏

題爲欽奉

聖諭事職方清吏司案呈奉本部送准戶部咨送到司案呈到部看得兵馬錢糧事本相須當作一家計筭故古之論政者先言足食而後言足兵先言去兵而後言去食緩急輕重炯然甚明所據戶部咨稱慎調遣重按伏汰冗食三事要行本部詳議具見廣集衆思以裕財用之意臣等忘其愚陋謹用開立前件擬議上請伏乞

聖明裁定勅下各該總督鎮巡等官欽遵舉行嘉靖三十九年二月二十七日題奉

聖旨依擬行欽此

一慎調遣議得調遣之舉本非得已蓋緣本地兵力寡少遇有重大聲息不能不調若使哨探明的徵調得宜不惟芻糧一無虛費亦且戰守均為有益但邇年邊臣多事張皇偶有小警輒行請調恣目前侵冒之奸為日後掩飭之計誠如該部所擬相應通行申飭合候

命下移咨各邊督撫等官各將本鎮兵馬嚴加操練務致精強遇有警報相機堵截不許輒張虛聲妄議調遣果有大舉之信徑自斟酌量行調援亦不得因而藉

口反悞軍機如或不念 國計悉聽各該巡按御史
指實叅奏重加究治

一重按伏議得按伏之舉蓋因虜之零騎出沒靡常
乃先伏兵要路以俟撲勦是誠先則制人之義但邇
來各該將領貪懦居半賊未至則虛增軍數肆其谿
壑之欲賊既至則實避兇鋒輒為保全之計在公儲
有損在邊計無益相應通行申飭合候

命下移咨各邊督撫等官今後不許輕議按伏如果的有
警報應該按伏取旨預領兵將官兵馬數目如果虛現
冒破備行守巡兵備等官逐一查點聽各該巡按御

吏及管糧郎中指名查叅支過錢糧卽於領軍將官名下照數追陪或拏解至京從重治罪以示後戒
一汰冗食議得 國家養育邊軍極其優厚故居則有月糧出則有行糧寒則有冬衣布花至於獲功則又有重大陞賞無非欲其精健以為敵愾耳乃今老弱叅雜所養非其所用之地逃亡掇冒該部論之已詳有名而無其實相應通行申飭合候

命下移咨各邊督撫等官各選風力守巡兵備官員遵照前議親歷各該城堡將見在兵馬逐一查驗精壯者照舊存留老弱不堪者盡行沙汰戶內果有壯丁准

欽定四庫全書
卷四
十一
當收補其軍士逃亡馬匹倒死即行開除如敢仍前作弊以蠹邊儲聽各該巡按御史叅究查治

覆南京內外守備等官報振武營兵作亂處分疏
題爲總督糧儲官捐勒月糧激變事職方清吏司案呈
奉本部送兵科抄出南京內外守備司禮監等衙門
太監等官何綬等題又該南京兵部尚書張鰲等題
爲總督糧儲勒減軍糧激變事俱奉

聖旨兵部看了來說欽此抄出送司案呈到部看得南京
營兵本以柔脆之質原無驕悍之習乃今一唱群和
蜂起作孽攻圍公署忘

朝廷豢養之恩戕辱部臣成冠裳倒置之禍履霜堅冰
真不可長今據彼中所奏大率皆謂督餉官員激變
所致但內守備太監何綬外守備魏國公徐鵬舉協
同守備臨淮侯李庭竹叅贊機務南京兵部尚書張
整并營操等官都督僉事徐珏署都督僉事程規等
職任不同均有統御之責事之由起咎固有歸兵之
不戢罪難別諉南京兵部右侍郎李遂雖見佐乎本
兵原無關於機務似應分別議處伏望

皇上將何綬徐鵬舉李庭竹張整并提督營務坐營管操
官員嚴加切責令其戴罪管事一應內外兵食事宜

會同侍郎李遂及南京戶部掌印官便宜處置仍督同都督徐珏等不必株蔓果係首惡務要擒捕停當置之法典以全國體其餘人等但係協從務要曉譬明白悉從寬假以收人心其徐珏存留在彼員缺暫停推補候地方平寧有無功次可錄一併回奏本部一面轉行南京兵科會同科道掌印官將前項兵變始末根因再查的確月糧妻糧果否勒減即今作何議補應叅人員從實叅究以憑覆請嘉靖三十九年三月初七日題奉

聖旨是這營兵聚衆圍逼部臣必有不得已之情總督官

勒減月糧緣由着南京戶科從實查明具奏何綾徐鵬
舉李庭竹張縻俱有守備責任不能管戢都當究治且
着戴罪辦事與同李遂撫按軍民凡事許便宜處置各
營軍士平日受朝廷糧賞惠養輒敢不畏法度本都當
重處為首的着坐營管軍官查出治罪其餘的姑念激
變所致俱與赦免南京兵部仍出給榜文曉諭欽此
覆南京科道官楊銓等叅內外守備等官罪狀疏
題為總督大臣違誤月糧激變軍士懇乞

聖明亟賜究治失事官員以彰國法以安根本重地事
職方清吏司案呈奉本部送兵科抄出南京浙江等

道署道事本道試監察御史劉行素巡按直隸監察御史胡應文南京巡視京城江西道試監察御史趙時齊奏俱奉

聖旨吏兵二部看了來說欽此又該南京兵科等科署科事南京吏科給事中楊銓等奏為偏刻大臣遲誤月糧激變軍士致傷國體懇乞

聖明飭治疎怠官員以肅兵紀以杜後患事奉

聖旨這所奏吏兵二部看了來說蔡克廉卧病廢事着革了職閑住員缺便推堪任的來看欽此又該南京兵部等衙門尚書等官張黎等題為保留賢能將官事奉

等道置道事御史劉行素等巡按直隸監察御史胡
應文巡視京城御史趙時濟南京兵科等科給事中
楊銓等各題奏前事大率言南京營軍逼死部臣皆
由減扣月糧激變南京戶部尚書蔡克廉罪則難追
戶部尚書馬坤法應追論該司員外方攸躋主事安
謙法當并論提督振武營都督徐珏程規所當究治
守備太監何綬魏國公徐鵬舉叅替機務尚書張鏊
右侍郎李遂所當薄治及該南京兵部等衙門尚書
等官張鏊等題稱原任分理振武營務都督僉事今

被論徐珏才猷忠勇會委巡視擒獲乘機搶虜之人
一十餘名捕斬惡首一名餘皆奔遁人心遂定乞要
照舊留用各一節除查係文職者吏部徑自議覆外
爲照南京營兵之變雖起於旦夕而釀禍之由寔積
有歲年鼓噪之衆無異過陞根本之地爲之騷動內
外守備等官何綬等已經本部覆奉

欽依嚴加切責戴罪辦事今據南京科道等官楊銓劉行
素等交章論列前來如內守備太監何綬外守備魏
國公徐鵬舉協同守備臨淮侯李庭竹久叨鎖鑰之
寄均非統御之才防微杜漸不聞消弭於平時傷重

損威祇見張皇於臨事提督振武營署都督僉事程
規都督僉事徐珏職在兼營奉有專

勅豺狼滿道任其躡躅之兇虎兇出柙難辭典守之罪但
徐珏先經論劾擒斬僅有微功程規任方閱月兵將
尚未相識相應分別議擬伏望

皇上將何綬徐鵬舉李庭竹聽其自陳恭候

宸斷程規先行住俸徐珏照舊留用務要會同程規欽遵
明旨擒捕首惡以靖地方通候事寧之日一併議奏嘉靖
三十九年三月十一日題奉

聖旨何綬徐鵬舉李庭竹張鏊都着自陳程規住了俸着

戴罪管事徐珏姑准留用欽此

覆南京守備太監何綬等叅坐營等官罪狀疏

題爲乞 恩認罪并叅誤事官員以懲怠玩事職方清

吏司案呈奉本部送兵科抄出南京司禮監等衙門

太監等官何綬等題奉

聖旨兵部叅看來說欽此抄出送司案呈到部看得南京
守備司禮監等衙門太監等官何綬等題稱南京各
營軍士聚衆圍逼部臣身死叅稱各營坐營把總及
提督都督官員俱各有罪乞要詳議分別一節除徐
珏程規已經別本議覆外叅照南京大教場坐營署

都指揮僉事張鵬把總指揮朱元楊澤重舉劉漢楊漢小教場把總指揮潘清崔立沈沂神機營坐營以都指揮體統行事署指揮同知程鵬把總指揮李承宗振武營坐營署都指揮僉事華恩把總指揮徐衡張勲祈山別僉錢文凌芝張應科劉勲賈萬靳文逮鎮魏鎬史臣許國新江口把總指揮孫有馬桂童錦明知下情故不上達忍心坐視行小人樂禍之私袖手旁觀致大臣伏屍之慘內朱元之規避程鵬許國童錦崔立之逃匿尤可痛恨若不分別處置以後地方有事倣倣成風何以示戒合候

命下將朱元先行革去見任并實職程鵬許國童錦崔立
通行革任俱聽南京法司從重提問徑自具奏遺下
員缺查照推補張鵬等二十四員既稱倉卒之際奔
走宣勞各於實職上量加降級嘉靖三十九年三月
十一日題奉

聖旨朱元革去職任程鵬等都革了任着南京法司提問
具奏張鵬等各降一級欽此

覆浙江巡按御史周斯盛整飭海防疏

題爲哨報海洋重大賊情事職方清吏司案呈奉本部
送兵科抄出巡按浙江監察御史周斯盛題奉

聖旨兵部知道欽此抄出送司案呈到部看得巡按浙江
監察御史周斯盛題稱普陀外洋有倭船三隻傳說
倭賊造船大舉入寇及稱人心玩愒蓋由賞罰不明
乞行總督胡宗憲嚴督水陸官兵擊勦如有失事以
次論罪立有功效查實賞錄及要將失事人員處以
軍法各一節爲照倭奴航海以來深入浙直閩廣等
處肆行剽劫兼之內逆勾引往往得利而歸夷性貪
殘未嘗一日不思入犯之計乃今春初即肆窺伺據
其傳報聲勢漸張委非往歲可比但今見在之船數
本不多未到之船蹤尚未定若使當事諸臣及早圖

維不惟內地傷殘可以獲免而彼之方至者亦自將
少阻矣所據巡按御史周斯盛具題前因分別水陸
之兵申明賞罰之典極為痛切相應通行議擬合候
命下移咨浙直總督胡宗憲福建巡撫劉燾應天巡撫翁
大立鳳陽巡撫唐順之嚴督總副叅遊海防兵備等
官各於緊要海口分屯把截以防突犯仍要領駕兵
船出洋會哨與其擊之於岸上不若邀之於海中如
或自分彼此不行應援聽各該巡按御史查照水陸
責任分別叅究治以重罪果有奇功并擒斬功級作
速覈實具奏以憑陞賞其失事人員犯該情罪深重

者聽總督軍門先以軍法處治不得容其事後賄功
以圖倖免大抵治倭之道先在自治法紀果明賞格
果當人心無有不奮之理人心既奮蠢爾小夷臣等
知其不足滅矣嘉靖三十九年三月十七日題奉
聖旨是欽此

覆都給事中王文炳等弭盜安民疏

題爲倭寇猖獗懇乞

聖明申飭督撫臣工速加勦除以靖地方事職方清吏司
案呈奉本部送兵科抄出兵科都給事中王文炳等
題奉

聖旨兵部知道欽此欽遵抄出送司案呈到部看得兵科都給事中王文炳等具題大率謂閩廣之倭奴奔突方熾蘇揚之兵卒相繼作孽欲行各該督撫等官速行勦捕安集并欲臣等計議安民養兵免徵調之繁絕寇盜之源各一節臣等竊惟東南地方素稱富庶自倭夷侵擾以來數年之間漸就蕭索始而流毒於浙之東西繼而突及於江之南北八閩之殘暴軍書方聞兩廣之猖獗羽檄又至乘機構會雖間有俘獲之功勞師費財竟未見廓清之效外攘可虞內變載作所據該科論列前因誠地方至計但防倭事宜節

經本部議奏臣工建白言之不爲不詳慮之不爲不周若使當事諸臣矢心圖維事事有備自當坐收成績臣等謹依所奏逐一開坐上瀆 天聽伏望

聖明叮嚀督撫諸臣令其竭忠殫慮共濟時艱不得徒爲文具玩愒歲月其福建廣東流劫舊倭容臣等咨行總督浙直福建都御史胡宗憲巡撫福建都御史劉燾提督兩廣侍郎鄭綱上緊勦賊以靖地方如敢仍前怠緩聽臣等與該科指實叅奏以俟

聖斷嘉靖三十九年三月十八日題奉

聖旨安民在守令得人近年各官恣意貪殘剝害以致百

姓困苦這所議是吏部都察院便行文與各該撫按官將司府州縣正佐等官嚴加考察貪暴殃民的限一月內奏來處治其餘依擬行欽此

一何以安民議得自倭患以來兵荒相繼十室九空征歛百出不止提編之苦剝削萬狀誠爲激變之由皮盡而毛無所附良可痛心合無備行總督撫按官督同司道府州縣官務將殘民多方撫字一切無名之征以次停罷被災地方應作何賑貸作何蠲免具實奏請聽候戶部處分其大小職官贖貨害民者文書到日限一月以裡各取大甚三四人指名叅論請

旨拿究大抵爲政在人政貪則民殘政清則民安提綱挈
領此爲首務

一何以免徵調之繁議得遠調客兵不如團練鄉兵
此誠不易之論况所調狼土等兵兇狠狂悖十倍倭
奴總督既不能節制其將將領又不能約束其兵如
近日川貴總督侍郎石永所奏可以爲鑒但議者動
以鄉兵爲怯懦緩急難恃不知近日浙江揚州之變
多係土人何其勇於私鬪而怯於公戰哉是在處置
之得宜耳合無備行督撫等官嚴督各該海防兵備
守巡將各處鄉兵係隸行伍者責成軍備募自民間

者責成有司如法團練務求實用至於容兵仍遵
明旨不許輕調騷繹地方以重民患

一何以絕寇盜之源議得蠢爾倭奴敢肆流劫者皆
緣我之內逆爲之嚮導也倭奴非內逆無以逞狼貪
之志內逆非倭奴無以遂鼠竊之謀必須禁捕內逆
方可消除外寇合無備行督撫等官責令軍衛有司
將沿海居民逐一清查造冊在官稽其生理時加約
束敢有仍前不悛從倭為逆者許令同里之人赴官
首告即于犯人名下追銀三十兩充賞本犯從重處
治至於各處無賴之徒竄名軍中巧立報效贅畫名

色平時則坐糜公廩有事則爭冒首功妄言休咎盛
惑人心造挽是非持官府無寇之形有寇之實比
諸內外二逆爲害尤劇合無聽本部轉行各該巡按
御史備查軍前一應報效立功武生占候醫卜各項
人役即日勒令回籍功次不明者通行查革大抵賞
功固當從重無功難以受賞賞格既明人心自奮拔
本塞源此爲要務

覆雲南鎮巡官沐朝弼等戒諭緬酋悔禍自新疏
題爲地方重大夷情事職方清吏司案呈奉本部送兵
科抄出鎮守雲南總兵官征南將軍黔國公沐朝弼

巡撫雲南地方贊理軍務都察院右副都御史游居敬巡按雲南監察御史王大任題俱奉

聖旨該部知道欽此欽遵通抄送司卷查先該雲南撫按總兵等官王昺等具題該部議行會同從長計議悉心體勘莽酋吞併疊端各整精兵相機勦殺欽遵去後今該前因查呈到部看得黔國公沐朝弼巡撫都御史游居敬巡按御史王大任各題稱緬酋莽噠喇始因讐害諸夷繹騷內地繼而畏威遠遁邊圉已寧乞要特寬既往許其自新及申飭漢土官軍嚴加防禦各一節爲照馭夷之方固當示以不治守邊之道

允當謹於未萌所據緬酋奔避喇震驚之狀雖云可
諒任悖之罪本不容誅若使輒為解嚴漫然無備萬
一別啓戎心關係不輕雲南守臣具題前因夷情邊
計俱已周悉臣等無容別議合候

命下移咨巡撫都御史游居敬會行總兵官沐朝弼宣揚
朝廷恩威務令緬酋益加悔悟各安生理毋得冥頑弗
率自取勦滅一面督行三司守巡兵備等官申飭漢
土官軍時加防禦無墮彼計一面傳諭車里老撾木
邦隴川干崖萬甸等司土官土舍人等不許交通結
納自相讐害如或違犯悉聽鎮巡官拏究重治嘉靖

三十九年三月二十三日題奉

聖旨是欽此

遵諭條上弭盜六事疏

題爲傳奉事職方清吏司案呈奉本部送嘉靖三十九年三月二十五日申時該司禮監太監黃錦於

迎和門傳奉

聖旨朕聞各處強賊甚多何有司者熟心坐視全不經理兵部便行文與各該巡撫官便着嚴督有司撫緝擒捕務要靖除如仍前怠視的從實叅究處治欽此已該本部即日通行各該巡撫官欽遵施行外所有撫緝擒

捕應行事宜乞爲議處案呈到部臣等議得致盜之由在於賦繁役重弭盜之方貴乎正本清源邇來各處地方蜂起爲盜大則劫庫戕官小則傷人黷貨推求其故實皆各該有司貪殘無狀忍心坐視所致其在南畿則選退水兵流落無歸其在北畿則饑饉荐臻艱窘無賴以故比之別省爲害尤極仰蒙

聖皇在上特勞

宸衷俯降 綸音憫其無知之愚首欲撫緝恐其迷復之凶方議擒捕仁至義盡臣等愚昧實所不及謹將應行事宜列爲六款開坐上聞伏乞

勅下各該巡撫官督同守巡兵備軍衛有司等官從實舉
行備將靖除過緣由每月終具實回奏如敢仍前怠
玩容臣等與該科查叅究治嘉靖三十九年三月二
十六日題奉

聖旨是欽此

一罷無名之征臣等看得各處地方兵荒積歲民不
聊生應辦差稅尚且催科不前重於額外之征如提
編河夫脩邊買馬等項其繁如蝟官以集事為能專
務垂楚民以偷生為重相率流移聚而為盜勢所必
至合無通行各該巡撫官今後非奉 明旨一夫不

許擅撥一錢不許擅科各將停罷過差從明白具奏
一開自新之路臣等看得各處盜賊本係良民止因
饑寒所迫自罹法網必須解釋脇從方可搜捕渠魁
合無備行巡撫官刊示曉諭大意謂汝等原係良善
衣食不給荒落至此即今

恩如天深憐汝等無辜汝等各宜仰體

聖懷共圖自新歸復原業貧不能歸者聽所在入籍或投
充軍役以示存恤如敢稔惡不悛梟首之例具載典
章自難輕貸至於江南水兵原係無籍棍徒希餉應
募一日裁革無所資藉因而流劫江湖之間如近日

泰興縣者是其一也文書到日巡撫官即將精壯者通行查出仍與收伍一以網羅奸宄一以潛消隱患一議賑恤之方臣等看得弭盜莫先於安民安民當先於賑貸京城饑民仰荷

聖慈軫念發帑救恤遠邇喧傳感戴皇恩直同覆轉所

據在外軍民均係朝廷赤子似當一視同仁如蒙

勅下戶部備行各處巡撫官各將撫屬地方通行查勘何處災傷重大應該大賑何處災傷稍緩應該量賑一面動支倉庫不拘銀米先行賑貸一面具實回奏聽候議處其無災去處不許一槩舉行徒爲糜費

一稽查巡捕人役臣等看得軍衛有司俱設有巡捕
職官統領軍丁民壯專一捕盜近年以來漸就廢弛
甚至挾獲真正強盜受財脫放不能弭盜而反為盜
情殊可惡合無備行各處巡撫官各查撫屬地方軍
衛有司見任捕盜官職名及查應捕軍丁民快見在
若干逐一整頓停當一面咨部知會一面令其悉心
聽理遇有賊盜小則徑自擒拏大則申報合于上司
發兵勦捕如敢隱匿不報仍前怠玩徑自挾問究治
一責成監司守令臣等看得各省布按二司守巡并
兵備府州縣等官職在撫安地方禁戢奸盜邇來專

事逢迎反將弭盜一事視爲末務失職曠官誠如

聖諭合無請旨責成各官令其洗心滌慮一變舊習在守

巡兵備則嚴飭官兵往來巡歷在府州縣正官則慎

固封守用心防禦若縱容盜賊不行擒捕十名以上

州縣掌印巡捕官住俸載罪五十名以上降俸一級

立功自贖百名以上并將守巡兵備官叅奏處治

一定立賞功規格臣等看得勦捕賊盜陞賞雖有舊

例日久未經申明人心無所激勸合無通行各處巡

撫官今後所屬地方果有強盜聚至十人以上兇惡

顯著曾經對敵當陣生擒二名及斬首二顆者准陞

一級不願陞者賞銀三十兩若不係臨陣止係緝捕者每名顆賞銀十兩拏獲竊盜一名者賞銀五兩夥內能自相擒斬者免其本罪仍一體陞賞經該官冒酌量錄叙應賞銀兩先儘賊銀不敷之數於無碍銀內動支

覆南京兵部尚書張鰲等擒獲叛兵周山等疏
題爲擒首惡以安重地事職方清吏司案呈奉本部送兵科抄出南京兵部等衙門尚書等官張鰲等題奉聖旨兵部看了來說欽此欽遵抄出送司卷查先爲總督糧儲指勒月糧激變事該南京內外守備太監何綬

等題該本部議擬覆題節奉

聖旨各營軍士平日受朝廷糧賞惠養輒敢不畏法度本都當重處爲首的着坐營管軍官查出治罪其餘的姑念激變所致俱與赦免南京兵部出給榜文曉諭欽此已經通行欽遵外今該前因查呈到部看得南京營兵本以烏合原非虎旅豐儲坐食受朝廷養育之恩沃土安居無邊陲征戍之苦不能感奮效忠外靜倭氛乃敢干白晝大都之中脫巾群噪戕辱部臣據城勾虜雖少異雲朔之兇越貨傷人寔不減甘涼之變律以無將之戒即使通行誅夷亦不爲過仰蒙

聖皇在上好生之心乾坤合德燭微之智日月同明憫其
無知止欲擒其首惡開其自新遂盡赦其脅從至仁
大義招揭無遺遂令渠魁相繼就縛一時根本之地
倏爾輯寧四方觀望之情居然消弭地方幸甚臣等
幸甚其所據逆犯周山蔡忠劉鑾滕彪顧山陳官三
鄭計孫鮑惠褚號金嚴甫張玉馬紀繆鸞劉華夏鐸
李伸李文昇祝杲朱受兒謝學錢用江伏住江甫蔣
貴葛貴二十五名罪惡深重難以輕貸合行南京兵
部會同內外守備三法司堂上官并掌科掌道官文
書到日再審無異即便押赴市曹依律處決中間果

有監故者一體斬首梟掛作孽去處以示懲戒脫逃
唐四兒縣賞構捕務在得獲其餘無名者縱有脫漏
欽遵 明旨悉行宥免以後不許諸人挾讐攀告致
生疑懼南京兵部仍出給大字榜文明白曉諭嘉靖
三十九年四月初二日題奉

聖旨這件事情還着三法司會同科道官等再詳議來說
欽此

會議監察御史趙時齊等叅南京內外守備等官
分別去留疏

題爲錢糧匱乏軍士驕縱懇乞

聖明速賜處分以安根本重地事戶科抄出南京江西等道掌道事試監察御史趙時齊等題奉

聖旨該部看了來說欽此欽遵抄捧到部臣等會同太子太保吏部尚書臣吳鵬等看得南京江西等道掌道事試監察御史趙時齊等具奏前因大意謂兵食二事所當處分及稱叅贊機務南京兵部尚書張鏊量行調用內守備太監何繼老疾外守備魏國公徐鵬舉協同守備臨淮侯李廷竹闌茸乞要更選各一節除事關錢糧移咨戶部外其自議覆外爲照尚書張鏊素稱清謹本無顯過祇緣地方之事起自倉卒應變

才略委非所長根本重地以難復任魏國公徐鵬舉年雖近暮精力尚強且久守留都人心頗服似應勉留臨淮侯李庭竹本以常流冒功重寄既已傷重損威更難展布似應罷斥但各官先奉

明旨戴罪辦事繼復令其自陳以俟

宸斷即今地方多事全賴耆臣通應亟行議擬合候

命下將張鰲行令回籍聽候調用李庭竹革任閑住遺下員缺容臣等會同推補徐鵬舉仍令策勵供職以俟後效其稱營軍散處操練之法事在彼中聽内外守備官徑自計處具由回奏六監何綬查係內臣去留

出自

朝廷臣等不敢定擬嘉靖三十九年四月初二日題奉
聖旨是何綬降三級退了徐鵬舉着用心策勵供職李庭
竹華任閑住張鏊着致仕江東改南京兵部尚書加太
子少保叅贊機務寫勅與他着上緊去欽此

覆貴州巡按御史鍾沂條議飭治土司疏

題爲飭治土司以靖邊境事職方清吏司案呈奉本部
送兵科抄出巡按貴州監察御史鍾沂題奉

聖旨該部知道欽此欽遵抄出送司案呈到部看得貴州
地方號稱荒服自我

聖朝啓運以來漸被聲教張官置吏幾于中州相等流官
之外所以又設宣慰宣撫安撫等司正欲以夷治夷
共圖保障所據巡按御史鍾沂條議飭治土司事宜
夷俗政體委有裨益相應開立前件議擬上請定奪
嘉靖三十九年四月十三日題奉

聖旨是欽此

一禁苛罰以奠民居看得前項夷民窮瘁至極所在
土官乃敢公肆貪殘全無忌憚良以法紀不明之故
相應嚴加禁戢合候

命下本部轉咨

巡撫都御史

王守仁等

御史嚴行各該守巡司道等官多方傳諭各該土官人等務遵 朝廷律例悔過自新痛革宿弊敢有仍前縱令目把總小牌人等巧立名色恣肆非法科罰土民下及鷄豚貽患地方者許撫按等官先將目把人等徑自拏究正罪發遣其各土官爲害事情悉聽核實具奏以憑覆請追奪降級以彰 國典其有心撫字使夷民得所者亦要一體獎勵明昭激勸一絕借兵以遏亂略看得土司設立兵馬原爲保安境土借兵助逆已干擅調之律衆機肆掠又犯縱軍之例相應亟爲禁革合候

命下本部移咨巡撫都御史高紳及咨都察院轉行巡按御史嚴諭土官頭目馬頭人等自今以後務要各遵約束以保信地除奉有明文調取者即行策應敢有仍前恃強輒興事端借兵警殺貽害地方者撫按等官即時拏究酌量所犯重輕照依律例問擬罪名星馳具奏以憑覆請定奪

一定官印以一事權看得土官襲替載在令典承襲則有預勘之文妄保則有發兌之例兵隨印轉皆自朝廷總之豈容任情爭奪以致兵連禍結之弊相應通行申明合候

命下本部備行巡撫都御史高紳及各都察院轉行巡按御史及都布按三司守巡該道今後遇有上官襲替悉依御史鍾沂所奏重覆勘結類奏定奪如有不應承襲而妄行詐冒或官印既定而擅行爭奪及通事把事人等敢有撥置作奸者照依明例問發極邊烟瘴地方充軍以示懲戒

覆漕運都御史章煥條議經略河南四事疏

題爲略陳中原事體以備

聖明採擇事職方清吏司案呈奉本部送兵科抄出總督漕運都察院右副都御史章煥奏奉

聖旨該部看了來說欽此欽遵抄出送司案呈到部看得
總督漕運都御史章煥具奏前因大率言中原之患
在於妖民盜賊相煽而起故備述隱伏之情兼陳預
圖之策爲照河南地方乃周鄭陳宋之故墟黠悍之
風至今未殄項歲賦役繁興民已不堪徵調頻仍兵
又告疲以故妖言煽動賊寇縱橫其跡甚秘其患無
形誠有如本官所論厝火之警殊為可憂徒新之計
急當早圖合候

命下本部移咨河南巡撫都御史內脩明作之功外存敦
大之體相機舉措大率以撫輯殘民爲主所有屯重

我朝象傳察險隘時巡歷四事相應隔立前件議擬
上請定奪嘉靖三十九年四月十三日題奉

聖旨依擬行欽此

一曰屯重兵看得屯重兵以壓奸宄誠爲保護都會
至計但更張之初駭人耳目善始既難設立之後供
億不貲善後不易相應酌議合無備咨巡撫都御史
張永明將各該衛所城操軍人在省城者責成都司
在外衛者責成兵備着實訓練務使人皆精強足備
緩急其春秋班軍雖稱強半在外歸伍之日一體操
練如有玩愒因循徒爲文具者即使具實叅奏至于

州縣民快乃古人寓兵于農之意最為良法亦要一體整肅務臻實效

二曰收梟獍看得御得其道狙詐可使梟獍之人委當早處合無備咨巡撫都御史張永明通查所屬地方果有梟獍先補民兵其次則補民壯收之既得其人養之又有其具人自樂從事方經久

三曰察險隘看得草竊之奸每憑地利萬一竊據其中如往年石城青羊之變勞師費財動經數年方始蕩平所據河南直隸山東陝西之交山澤阻深奸宄窟穴誠當深慮合無備咨各該巡撫都御史青成所

在兵備守巡等官各將所屬險隘地方親詣體勘徑
自計處務期默奪潛消以絕禍端仍行具由回奏

四曰時巡歷看得各省守巡兵備等官職司撫安地
方禁戢奸盜巡歷一事具載憲綱但邇年以來專務
逢迎通衢街道歲時或至僻壤遐陬足跡不臨張官
置吏之義體國經野之方兩失之矣所據前事正與
弭盜款內所議相同合無備行都察院通行各該巡
撫都御史巡按御史查照先今事理責成各官令其
洗心滌慮一革舊習在守巡兵備則嚴飭官兵往來
巡歷在府州縣正官則慎固封守用心防禦若縱容

賊盜不行擒捕十名以上州縣掌印官住俸戴罪五十名以上降俸一級立功自贖百名以上將守巡兵備官叅奏處治

覆宣大總督都御史張松等條陳防秋邊務疏

題爲陳時弊度虜情慮貽將來大患懇乞

聖明申勅臣工務懷永圖責實效以保萬世治安事職方清吏司案呈奉本部送兵科抄出總督宣大山西等處地方軍務兼理糧餉都察院右副都御史張松巡撫宣府等處地方贊理軍務都察院右僉都御史遲鳳翔題俱奉

旨該部知道欽此欽遵抄出送司案呈到部看得總督宣大山西軍務右副都御史張松等條陳防秋事宜及該張松謂二鎮地方綿遠調度號令近則易於施行遠則勢不相及乞要議擬各一節為照

朝廷設置邊臣間外之權最為隆重一切機宜在鎮巡固有分理之責在軍門實為總攝之地方圉遠近變雖不可預圖調度方略責似難以別諉合候

命下移咨總督都御史葛縉力肩重任惟懷永圖審機決策合三鎮為一體早見預待收千里於萬全毋詳於近毋略於遠方稱

聖明委任之意其巡撫總兵官各有分方之責自合周防
曲慮事成安內攘外之功中間地方如果隔遠軍門
難以遙制者遇有警報一面從宜調度一面移文知
會亦不得藉口指示致悞軍機所據條陳議戰守慎
分防二事相應開立前件議擬上請定奪嘉靖三十
九年四月十五日題奉

聖旨依擬行欽此

一議戰守看得分布兵馬各守信地或以堵截或以
應援隨方開陳極爲明悉至於慎重南路以防紫荆
哨備獨石以護薊鎮尤爲有見合無悉如所議施行

但虜情叵測兵難拘泥總督鎮巡官呼吸之間仍要
隨機應變不得專持成議

一慎分防看得居庸南山一帶地接

京首當防禦頃年題奉

依防秋之期總督官統領標兵移駐懷來總攝諸軍巡
撫官統領標兵并東路遊兵督同兵備道駐劄分道
懷來甚得重手足以衛腹心之義其新舊遊兵分駐
西北二路五路叅將各防信地礦兵一千分布東路
仍照原議支糧俱應申飭至于欲將奇兵駐劄鎮城
一節又在于臨期酌量難以鼓瑟膠柱合無悉如所

擬徑自施行

覆宣大巡按御史王汝正覈實大同邊工陞賞疏
題爲邊備積壞虜患日深懇乞

聖明早賜經略以圖萬世治安事職方清吏司案呈奉本
部送兵科抄出巡按直隸監察御史王汝正奏奉

聖旨該部知道欽此欽遵抄出送司卷查先爲前事該總
督宣大山西等處軍務都察院右副都御史張松題
稱脩完大同西中二路邊牆一百六十餘里創建大
堡二座并壕塹墩臺及稱先任總督尚書楊博給事中
鄭茂御史欒尚約王汝正均爲可錄非敢僭議大

同巡撫李文進先鎮守大同總兵官張承勛均當首
論相應厚加陞賞郎中魏學曾副使王之誥僉事王
彙征叅議楊守愚副總兵趙崙知府劉衍祚功當優
論亦應厚加陞賞領兵脩守叅將孫吳王允亨朱雲
漢總提調原任叅將今充爲事官孫麒原任遊擊今
充軍李世賢守備戴國鑑詔革任叅將麻祿原任叅
將今充軍王鈺原任遊擊今充軍王良臣中軍原任
副總兵王尚忠致仕叅將陳力聽調遊擊趙伯勲中
軍呂勇通判張天愛宋蒞經歷郭邦輔劉寓安耿士
毅功爲次論相應量加陞賞并其餘効勞人員分別

等第巡撫大同右僉都御史李文進題稱總督張松
豐勛茂績非敢僭議去任副使楊師震似應厚加陞
賞等因該本部覆議為照大同一鎮與虜為隣而西
中二路尤孤懸塞外自昔所恃以為守者惟邊牆與
墩堡耳比年以來虜賊之所攻毀風雨之所摧殘所
存無幾遂令胡馬得以長驅如往歲右衛之困蓋亦
危於累卵矣仰荷

聖明留神西顧特為

簡任大臣經略其地復蒙特納言官之議大發帑銀脩築
邊牆改建墩堡而一時大小臣工各能仰體

聖心竭盡忠悃以監督者殫其力以防護者輸其謀通計
所脩邊牆一百六十餘里而創建大堡挑濬長壕又
不可以枚舉遂令二路城堡聯絡烽火嚴明耕牧漸
興商販亦通零寇因而不犯內地恃以無恐蓋屹然
雲西之保障也况脩復之議制若涉於因舊而版築
之勞功實倍于更新及查其改建挑濬多出原議之
外而工力節省又在常額之中其勞誠有足加者通
應叙錄以昭激勸如先任總督尚書楊博忠存體
國志切籌邊一意撫綏雖驅之力役而民皆子來多方
搜括至為之節縮而視若家務經始之初已忘其勞

告完之日咸頌其績功當首論但本官品級已崇以
難議陞然功在邊陲宜加錄蔭今總督都御史張松
雖蒞任日淺而安攘之心較若畫一經略之策克成
厥終則宜優論巡撫都御史李文進鼓舞衆士雖經
始而勿亟嘗歷諸艱至垂成而匪懈當爲重錄總兵
官張承勛固効有勤勞但先因地方失事重大督撫
等官俱行叅論已荷 皇慈矜宥容令戴罪近又荷
聖明移守薊鎮立功准贖似應酌處副總兵趙奇協心飭
備銳意脩防亦當併論郎中魏學曾會計甚詳供億
無缺副使王之誥僉事王彙征叅議楊守愚去任副

使楊師震協心匡濟竭力經營知府劉衍祚率作宣
勤供億不匱亦當次論叅將等官孫吳等或監督工
程而防護有賴或總理錢糧而供費不糜俱宜量叙
再照給事中鄭茂御史欒尚約王汝正奉使而首建
乎嘉猷省方而維持乎風紀共成安攘之大計竟立
華夏之巨防拘例固難擅議論功皆不可掩既該各
官具題前來委應依擬以示激勸但脩過邊工用過
錢糧未經覈實遽難題請合無恭候

命下本部移咨都察院轉行巡按御史將大同右衛等處
脩過邊工有無堅固用過錢糧有無冒破并効勞有

功人員一一覈勘明實作速具奏前來以憑覆議上
請陞賞等因該本部左侍郎江東等題奉

聖旨是欽此又查得先該本部題為分別將領功罪以昭
勸懲事節奉

聖旨張承勛着革去都督職銜戴罪防秋欽此除通行欽
遵外通查案呈到部臣等看得大同地方川原平行
在九邊中最稱難守至於中西二路密邇虜巢較之
全鎮尤號孤懸嘉靖三十七年以前牆垣傾圯蕩無
捍蔽以致俺酋生心日肆憑陵右衛雲川首遭圍困
之苦威平井朔幾成草萊之區仰蒙

聖皇在上時勤西顧遂虜入餉大收汎掃之功發帑鳩材
茂弘脩繕之略各該邊臣乃能恭體

聖心蚤夜匪懈通計補脩完邊牆一百六十餘里添築墩
堡一百二十餘座工甚堅高財復節省既經巡按御
史覈勘前來所據一時効勞官員除監工旗牌等官
張勲等一千五百七十六員名已經督撫衙門徑自
犒勞叅將王允亨近已病故外如巡撫大同右僉都
御史李文進先任鎮守大同今改薊鎮總兵官張承
勛心力殫竭樹百年夷夏之巨防似應首論查勘邊
事給事中鄭茂巡按御史藥尚約王汝正後先條畫

成一鎮安攘之偉績似應同論協守大同左副總兵
官趙奇整飭大同左衛兵備原任副使楊師震見任
僉事王彙征整飭朔州兵備副使王之誥總理糧儲
戶部郎中魏學曾分守冀北道右叅議楊守愚大同
府知府劉衍祚均有規畫之勞竟成設險之功內趙
奇王彙征精勤懋著似應優論見任叅將孫吳守備
馮詔陞任守備戴恩原任叅將朱雲漢麻祿原任叅
將今充爲事官孫麒原任叅遊今充軍李世賢王鈺
王良臣軍門中軍官原任副總兵王尚忠致仕叅將
陳力巡撫中軍官原任遊擊趙伯勳鎮城中軍坐營

官呂勇通判張天愛宋蒞經歷郭邦輔劉寓安耿士
毅均爲有功內孫麒李世賢王鈺王良臣其勞爲最
似應別論見任坐營官任漢原章秦松守備楊縉黃
文宋麒李志韓原任叅將余勛羅恭朱漢麻隆李璋
原任遊擊鄭捷丁堅福原任都司張濟秦鎮原任坐
營官楊德常銳原任守備任中道邢堂張勇王鏞下
實曹景魏棟儲臣劉忠孫繼業姜威呂和王力胡進
總督撫鎮衙門書辦吏典承差寫字陰陽醫生章文
渙范澄呂世安師禮揚名王天福賈天錫趙禎劉朝
恩貢汝儼胡文相杜文朝王良臣張宗仁蔣尚善吳

永寵任經宋文奇金孟春原開三等功亦當論見任
守備蔣譚卜大經原任守操趙鎮翟羽鳳陳夢麒李
漢卿王臣鄭重沈繼武牛相魏卿劉斌孫顯宗鄭魁
王承恩徐陞李章詹輝千把總官李桂王大海王堂
李進劉本經王朝臣陳鎮朱臣儲邦王三接張戢段
英馬洪劉君寵蔚璽麻錦王楠麻詔孫國臣盛鎮王
璽張原杲堂尹國斌張鐸原開四等似亦難泯臣等
逐一叅詳俱已允當係于激勸相應通行議擬合候
命下將李文進特加陞賞張承勛復其都督職銜鄭茂藥
尚約王汝正重加賞賚趙奇王彙征量陞職級揚師

震王之誥魏學會楊守愚劉衍祚同加賞賚孫吳馮
詔戴恩朱雲漢麻祿王尚忠陳力趙伯勳呂勇張天
愛宋蒞郭邦輔劉寓安耿士毅量加賞賚孫麒淮復
原職李世賢王鈺王良臣免其克軍就撥宣大軍門
立功自効任漢等五十一員名蔣譚等四十三員通
行總督都御史葛縉從重賞犒但

恩典出自

朝廷嘉靖三十九年四月二十五日題奉

聖旨這脩築邊牆墩堡各官效有勤勞李文進陞右副都
御史照舊巡撫張承勛淮復原職鄭茂樂尚約王汝正

各賞銀二十兩紵絲一表裡趙奇王彙征各陞一級楊
師震等各賞銀十兩孫吳等各五兩孫麒李世賢等依
擬任漢等將譚等總督軍門犒賞欽此

覆薊遼總督尚書許論等議防遼鎮前屯地方疏
題爲大虜再犯暫退出邊聲勢重大乞請發兵防救以
保危鎮事職方清吏司案呈奉本部送兵科抄出總
督薊遼保定等處軍務兼理糧餉太子太保兵部尚
書兼都察院左副都御史許論巡按山東監察御史
史官巡撫遼東地方兼贊理軍務都察院右僉都御
史侯汝諒鎮守遼東總兵官都督僉事楊照題俱奉

言戶兵二部知道欽此欽遵通抄送司案呈到部看傳
遼東總督撫鎮巡按等官尚書許論等具題前因大
率言遼東殘破虜患緊急欲要查處兵糧各一節爲
照遼東地方連歲荒歉死者過半近又加以虜酋之
擾入春以來月無虛日至于前屯一帶乃一鎮咽喉
之地胡騎不時剽掠行旅因而斷絕且自中前所失
守之後人心皇皇重以攻堡爲懼所據今日防禦之
略似當先以前屯爲急合候

命下移咨總督尚書許論嚴行總兵官楊照巡撫都御史
侯汝諒即將發回兵馬并見在兵馬分布前屯一帶

但有零寇抄掠相機鵬勦小敵不怯大敵可懲地方
之事自當漸有端緒一面將各該堡寨設法脩理賊
若大至則協力固守不貴三捷之功惟爲萬全之計
本部先發馬價銀三萬兩聽巡撫衙門給軍買馬以
壯軍威以後不許援以爲例此外一切方略應徑行
者徑自施行應具奏者作速具奏嘉靖三十九年五
月十一日題奉

聖旨是欽此

楊襄毅公本兵疏議卷四終